

四庫全書

集部

欽定四庫全書

集部

宋詩鈔卷

三六至
四十一

詳校官中書臣賈 鏌

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷三十八

內閣中書舍人吳之振編

沈遼雲巢詩鈔

沈遼字睿達以兄邁任入官為審官西院主簿出監
明州市舶司遷太常奏禮郎改杭州軍資庫攝華亭
縣事奪官徙永州元豐八年二月卒於池州遼畜聲
伎凡研間陶瓦金銅物皆閱數百年遠者溢出周

秦王介甫贈以詩云風流謝安石瀟灑陶淵明其子
雱亦有詩云前日覽佳作淵明知不如及徙秋浦築
室齊山名之曰雲巢一洗年少之習從事禪悅蘇子
瞻嘗語人曰睿達末路蹭蹬使人耿耿求此才韻豈
易得哉余閱其詩間出入俗調佳者亦生硬排翬不
知何以諸公見賞之如是也悉為汰去庶諸公不為
失言耳

寄陸九

賀老湖邊春水生野陽浮動北風輕
天邊重闕歌筵響
鑑裏綵舟金翠明大抵盛時須著意
要知吾輩未忘情
君如彥道能懷帽便逐輕帆作此行

寄才仲

陶令在彭澤放懷天壤間橫江三百里
往往向廬山多
尋簡寂醉時訪遠公間不復顧吏迹
世人指為頑公子
負文華少年成青綸風流不屑俗為邑
得星灣節節香
爐峯據案見蒼顏何勞事舟楫緩步
可躋攀形骸付物

外勿使人事關巖壑高世人有誰偕往還新篇定盈軸
佳句不可刪南風儻垂寄誠足慰衰孱

贈礪翁龍尾硯

龍尾山盤八十里龍尾有潭下無底秋月亭亭潭氣黑
其中有石色如墨山川秀氣散不為風雲頑不為砂礫
融結至寶有物主水上經營無處所經年始獲不敢賈
我昔游江南有客遺我誇龍子吾知龍能變化是或不
可制追琢為巨硯大筆揮離騷中圓體天形外方作地

象精光熠熠角生浪熟視乃有紺羅文瑩潤無與比玩
愛何可論我今樗散無所事特贈華陽鴻筆麗藻入吾
聞蜀都多學士寘諸文府為戰具君如窮經遂絕筆請
與大軸傳後嗣

春日行

宮梅撲地白氍毹細柳結烟金縷繁春華年年來不已
人生七十半衰殘少時豪放猶不敵何況羈棲落荆蠻
囊中琵琶金鳳閒古曲情深屬誰彈病目矇矇對荒山

東風有意為掩關棄置萬事一夢還江湖水生愁夜寒
甲辰年五月十五日夜澧陽觀月

少年悵不樂明月何為哉揚眉一遨賞寂寂更傷懷念
昔吾州樂泛舟湖上來佳賓適所好歡計成金壘妖歌
有送響度曲清且哀留連夕陽下夜色起山隈光明水
晶域素彩中天開龍香弄微風四顧絕纖埃澄波照上
下倒影出瑤臺紅燭漸向微始知夜漏催美人屢更衣
含笑玉山墮歡樂殊未央鼓枻中洲迴人生無憂患遇

樂且銜杯悵余失交臂萬里來天涯羈愁那無感情慮
長如灰神遊忽自笑安知顧形骸

贈大中鎮國長老

昔從東南來稅駕依金地迎風步峻閣始眺灋陽市蒼
茫烟霧下一水縈如袂村落雜連峯精廬遙相峙宅土
信羈客杜門忽彌歲風雲一蕭散身世兩無累懷歸悵
有感史遷念留滯引脰企昔游野馬埋蒼翠何時盥
去復將老師住請掃嵩下石為述空王偈

遊瑞嵩

已恨初年不學僊
老來何處更參禪
西風搖落歲事晚
卧對高巖看落泉

寄四明神智師

甬水樓頭看盡山
南城寺裏扣禪關
老師多事猶相記
千里馳書慰病孱

次韻酬明發華宗

長卿倦遊欲東還
幸與諸公俱出關
世事轉頭都委夢

人生何計得長閒
殘花爛漫飄村塢
細雨廉纖隔碣山
誰寫熙寧十才子
老夫亦入畫圖間

出有正元十才子
出關圖至今多有

本傳

奉陪穎叔賦欽院牡丹

昔年曾到洛城中
玉碗金盤深淺紅
行上荆溪溪畔寺
愧將白髮對東風

龜茲舞

龜茲舞龜茲舞
始自漢時入樂府
世上誰傳此樂名
不

知此樂猶傳否黃扉朱邸畫無事美人親尋教坊譜衣
冠盡得畫圖看樂器多因西域取紅綠結裯坐後部長
笛短簫形製古雞婁指鼓舊所識饒貝流蘇分白羽玉
顏二女高髻花孔雀羅衫金畫縷紅靴玉帶踏蓮出初
驚翔鸞下玄圃中有一人奏羯鼓頭如山兮手如雨其
間曲調雜晉楚歌詞至今傳晉語須臾曲罷立前廡歎
息平生未嘗睹清都閬苑昔有夢寂寞如今在何所我
家家住江海涯上國樂事殊未知玉顏邀我索題詩它

時有夢與誰期

寄文翁

白兔觀邊僊路長華林修竹到南莊
比鄰雞犬易過屋
適意琴書動滿牀
目斷鵲鴿分漢節
心隨鴻雁極天潢
欲移畫舸遥相訪
正恐田家五月忙

奉酬舜文即次原韻

我生無庸如斷絡
已分老死填溝壑
不能掉舌强附會
何暇論經更穿鑿
萊蕪甑敝欲生塵
玉川婢僮常赤脚

世間要途不易驟身外名韁誰可縛本無道義輕王公
亦不悲傷念流落水鄉夏半不厭熱繞舍新篁尚含籜
訟庭勾釘非吾事吏按煩苛都可却農民漸使安叨畝
和氣終須蠲疹瘼子羽不肖過我室懸榻何妨卧西閣
年來多病亦廢飲墻下度泥委杯酌舊學迂疎不適時
譬如石田何可獲欲捕大鵬遂方嶠終不勞心事弋繳
行當歸掃烏峯下試煉金鼎長生藥

題楊師壁

年來病勑厭尋山，且寄清冷白水間。
最愛楊師舊茅舍，頻來借榻伴高閒。

寄慶復允中

木葉飄蕭已半殷，試臨高處望君山。
野田繚繞來時路，畫舸逍遙數日間。
坐想故人應見憶，如今禿髮不勝斑。
兩州相望無千里，莫惜新篇斷往還。

贈清道

少年好書老彌篤，牙籤錦囊數百軸。
江左墨妙世不曠，

有唐諸公廩可錄諸公草法無可稱中葉始有張顥名
張顥下筆有神會其妙不似點畫成後來沙門有藏真
措意瀟灑尤更精當時二子最名盛至今學者皆伏膺
本朝蘇公名弟兄汝南蒲陽亦有聲比來諸公已老死
其餘卑俗類可憎我昔乘興遊都城列子示我新素屏
始知無擇得此道長沙道人今復生歸來窮巷揜柴荆
惠然相訪得忘形贈我數行豈無意勢如九河注滄溟
中間龍蜃降沒升歎伏不暇獨可驚自欲何能謝言情

欲贈金玉還愧輕慙勤之揖喜不勝使我區霧老後明

池陽

池南柳色未全黃
池北萱芽尚帶霜
老去尋春不嫌早
春深留與少年郎

寒烟寂寂鑱青谿
圓月亭亭上曲堤
小杜風情遙可想
閒調絲竹舞金泥

林平

河邊柳眼澹烟浮
臘破春歸一歲休
不復昔時羈旅恨

離明還泊北城頭

次韻和宋平

憶昔銜杯折梅處孤山寺前千丈塘橫遮青林鬪殘雪
暗入紅袖留清香往遊都城雖屢賞縱有素艷終殊芳
莫辭遶林行百匝更嚼嫩藥薰愁腸

和張寶臣即元韻

始余倦遊念還家一身泛然寄天涯頭上白髮日益加
朱顏不駐爐中砂飄飄逸氣凌紫霞猶着黃綬趨泥沙

烈日漫憑烏帽遮窮巷歸來夕烟斜開門正欲謝喧譁
何憚屋室多痺痼楊柳欲落鳴饑鷄八月秋風想乘槎
市中有金誰攫拏自欲歸耕老畝畲嗜好已背梨與樗
那復開口增訛訛眼昏白晝生黑花老悲獨向兒女夸
枯轍不能活鱗鰲騏驎垂耳伏鹽車一官欣得飽魚蝦
頓首致謁辭當衙愚拙不遇何復嗟川陸舊遊殊不遐
才渡揚子已聞哇吳女蓬鬢多髦髻西湖信美謝若耶
松竹夾道繁根芽勢利屈曲如盤蝸衡青變化乃龍蛇

深閨召客舞雙髻撫手相勸競呀呀西庵老師自煮茶
太守陳樂奏渝巴湖水洗面去塵痂故山白怕留文沙
田裏小兒放猪猡為樂往往鳴簫笳亦有狐兔怛怛且
令人指手徒為柳賤職馳使告及瓜聿來甬東絕紛華
箝口不復露頰牙聯曹相係瓊與葭上官庇覆不汝瑕
優游重見林中葩四時風露換物華新詩迭致思無邪
吾子俊拔誠可嘉豈獨鄙言數矜誇高吟大字耀紙麻
時雖未亨道不汙屢出珠玉能愧奢麻姑手爪幸見爬

長篇垂況理不差正如矛戟相鏖義

走筆奉酬正夫即次元韻

樂府古有行路難但悲白髮憐朱顏時命多向賢才慳
詰屈不平萬世間壯心欲馳步輒跚試出鋒穎官已瘝
中心忽忽惓且煩不如歸去江海閒要懸大刀數撫銀
何陋九夷與八蠻自顧鄙性疎且頑誰能隨時事黠姦
從來多病筋力孱正當落魄卧深山敝廬數椽麤可跽
安居里巷鍵重關終日無人踐茆菅冠帶不修衣袂黥

高歌一曲舞雲鬟比鄰有酒時見頒春風秋月與我閒
夜靜佩玉鳴珊珊高人逸士或往還蓬舟自訪來前灣
行歌紅藥與香蘭已增俗物近塵寰一身蕭然念早鰥
髭鬚憔悴半已斑誰能更問禿與鬢且聽溪水聲潺潺
強來為吏腰少彎幸讀君詩錦繡篇相望鬱鬱何可刪
君豈久居五兩綸

次韻酬李正甫對雪

苦寒冽冽日夜增朔風軒軒勢相凌遙山頑碧空峻嶒

高堂閒坐擁敝繒欲醕一杯意已仍結歌黃竹但伏膺
愁雲漫漫方四騰海氣上薄初不勝雪霰雜下風作稜
漸著弱柳頭鬢鬢半積軒砌發幽層枯樹兀兀愁饑鷹
紛然不已失溝塍一飲一斗心易矜試步薄冰猶戰兢
圓圭方璧降復登憶昔前年正嚴凝攝事大蜡清晨興
平生看雪實未曾健僕駿馬半醉乘或前或後望交朋
不辨明河與玉繩烈火萬炬氣不蒸被面唯有凍與冰
歸來心目如水澄喜看道傍剝作燈豐年為瑞古有稱

凍死何暇談鄒滕欲邀君飲恨不能相酬莫問準與繩
詒隱者

訪我維摩室不值香積飯開囊出黃粟為汝林中爨軟
語少稽留青蔬亦易辦勿言方外趣我汝真如幻

樂神

夷人事神正自醺山頭水邊與神樂大巫龐衣手搖鐸
羣兒伐鼓更鳴角青山歷歷神欲歸湘水瀰瀰日脚西
小大酣歌向山棲神羹滿盎均汝釐

日落

日落沙頭山已昏
饑鳥投暝下前村
誰云野客無多事
步出林間自掩門

棗花寒

山禽哺鵲半欲搏
坐想葛帔臨風湍
數日陰霖復未暢
不知更作棗花寒

復作過商翁墓

當年不佩封侯印
後世誰尋墮淚碑
定遠將軍豈夸勇

關南常侍最能詩故人不解傳遺事五嶺猶能識信旗
墓下寂寥無鼓角愁風獨向白楊悲

蒼頭已作歸來曲不信全生庾氏碑疑有史官爭立傳
終無嗣子與聞詩後房已閉千金妓私廟空收五采旗
聞說詔書優贈典孤魂應結九泉悲

銘母潭

余讀子厚書始聞銘母潭榜舟西江下振步愚溪南高
下凌山阿松篁蔽秋嵐土人識其地古木森梗楠水深

日波瀾此理亦易探古木為鈎鋤土音正相參所記或
不然信書殊未甘此公廢已久山水窮年耽造化毫楮
間浮實微相鏤幽心有默識西歸助清談

贈廣祐上人

不入四明路侵尋已十年葛藤論往事蟬蛻想蒼烟松
下數株石巖前千丈泉何為不肯住芒屨更參禪

奉簡莘叟

紅葉飄蕭秋後山相望止在一嶧間老夫無用方安命

夫子何為早閉關世事不隨歌吹樂此身畧與水雲間
經年不見寧相外安在區區事往還

火星巖

火星巖下石峻嶒殿閣相望止一僧莫問人間興廢事

門前流水几前燈

侯灘

江流激激過侯灘更上山頭看打盤百歲老人親擊鼓

城中憂樂不相干

踏盤曲

湘水東西踏盤去青烟白霧將軍樹社中飲酒不要錢
樂神打起長胛鼓女兒帶環着縵布歡笑捉郎神作主
明年二月近社時載酒牽牛看父母

過商翁墓

征南名地蚤相知老向瀟湘看立碑壯節獨馳南嶠事
古風不括故山詩愁烟半鎖黃茅壠部曲誰尋舊將旗
遙矚蕪江想靈氣孤雲落日不勝悲

湘中宿臺步寺

湘源初甚微，屢挹不滿釭。比至臺步虛，泛泛為長江。虛
頭市初集，魚豆皆成椿。夷獠不識人，笑鬻蔬與龐。綠荷
竭苞苴，人散誰復撞。鷗鳥亦來下，酒旆停空杠。我來憩
桑門，竹戶映蓬窻。夜寢那可寐，江流正淙淙。

泛舟上湘口館

瀟水漫南來，湘川趣東下。二水始相會，清豪不相藉。山
迴石瀨出，木老脩烟嫁。泛泛白蘋洲，林風媚如畫。宿昔

感騷憤幽興遙相借不謂垂老年羈孤窮山舍潮來刺
舟去孤月臨清夜安得跨鯨魚不復人間化

禪僧巖

瀟湘山水窮欲徧最後乃得禪僧巖禪僧成道久已化
獨有崖崿青巉巖降身入洞不甚險突兀三室誰彫劖
東西有道若蛇竇白雲幕幕門無緘持火旁行不知際
七穿八竅遙相銜涓涓乳泉白如雪由來此地殊仙凡
主人引我復深入行指嶼穴尤嵌崕中間石鼓有異響

擊拊想可參韶咸吾身久病苦下溼復畏神怪來邀攬
直趣出洞上南嶽豁若巨海張雲帆山花爛斑出竹梢
亦有禽鳥聲誦誦欲還未可復小駐日脚已過東岡杉

贈別子瞻

平生雅游眉陽客五年不見鬚已白借田東坡在江北
芟夷蓬蒿自種麥相逢不盡一樽酒故態那復論歡戚
手抱阿武勸餘漑維摩老夫失定力老夫寂寂出三湘
更欲卜居池水陽薄田止須數十畝田上更樹麻與桑

老來正苦迫生事清明雖近猶可袂罷亞若可博乾麩
以無易有遙相望我舟即行不可駐欲卜後會誠茫茫
他時有信若可寄不用辛苦為詩章

德相送荆公三詩用元韻戲為之

幽居卧山間不與世相接餘生委蒲柳滯想遺空劫德
相蚤相親顧我情未厭數枉南堤步更引青谿舸相見
亦何事坐對羣峯疊陽春始萌動烟嵐生鋤鋏廉纖數
日雨萬里浮塵浥赤白未殘花修穠半敷葉行招老僧

語遙矚東田饁窮崖歷可造峻流誰敢涉衰齡易生倦
幽巖就調攝德相知我僊雙眸困垂睫高詠楚公作欲
引維摩策初聞未甚解靜聽疑可獵有如太華峯跛躄
豈易躡不知泛滄海何力施舟楫遙窺土山勝肯乃文
靖業二公雖異時名德遠相躡山川若有待風物增悲
慄未知蔡侯履孰與支郎蹠勝游可槩見筆力方義業
更紆別後情琅琅鋪簡牒倡高必和寡排比安且帖蕭
竽合古律宮羽自諧協世人所欽慕有口空嚅囁東牀

坦腹士左右參經笈為賦奕碁句璆琳吐胃脇鏘然不
可閉由來知捷捷謂如伯升勇揚兵開宛葉豈此文信
君無謀喪張靨致死在必勝甘言方示怯尾章示戒訓
足以傳芳諜後生知自勵何必捶楚挾正如嚼冰雪清
冷快牙頰我昔造公室公方任調燮辱枉淵明贈今猶
秘巾篋當時隳官去終身欣廢跼冠帶遂已捐頭腦深
埋摩肯羨冥冥鴻安知栩栩蝶心清久無夢神固安知
魔少小銳文史老大人更懾是古豈余心非今寧我慙

况復論翰墨爾來那可輒不識渾脫舞何愧張顛帖所
居養鷺雁菰蒲觀唼喋亦有藜藿畦麤充七與挾孰知
名可貴安用祿為楣無求豈有沮不動誰能嚼汝堅百
萬衆淮濱空雉堞陵陽丈五墳朱雲本輕俠百年竟何
往終當封馬鬣何必悵霜毛更向窓前鑷

德相所示論書聊復戲酬

野舍老餘生雅尚今已愜不逃世憂患餘事寄巾蹠行
尋青山轉坐對青山疊欲隨白雲去儻與幽人接盤桓

太清洞悵望長江
牒昔時古錦囊
今還白羽策不復叔
夜煨真得孫登攝
九華一枯藜青溪一孤楫
得喪苟自達死生安足懞
朱顏久不駐白髮何為鑷
羣物自流轉吾生寄天變
德相屢相過老夫寧足躡
由來廢井水不如長劒缺
往往論書法軒軒兩目睫
中郎石經在元常表軍捷
漢魏多傳人至宋有遺帖
唐室初最盛漸衰自中葉
歐虞緬誰嗣顏柳何足躡
篆籀昔難工草聖誰敢輒
巨山作散隸雄古掀龍鬣
貞觀喜飛白凌厲騰春蝶

豈特豁神觀直可祛鬼魔古人有所寓天性難必協所
志有大小其材有勇怯或憚懦文雅或軒昂豪俠或轉
戰鞍馬或驅馳弋獵或發於止諫或得於訟牒或奮奪
牀陛或造成械櫓或為神所追或自勢所劫或醉以賈
禍或詐以行謀或習於娛樂或勞於吐哺有燦如文錦
有勁如金挾有倚如戈鋒有點如山業有駛或如波有
媚或如靨或騰如烟霏或落如鳥跼淵妙欲飛動拙惡
愧偏摩當寢或不寐當晝亦忘飮有譽終甚微或毀則

羣囁為功有不至考古安能厭十年幸能就萬金毫豈
浥金玉敷卷軸龍蛇閱箱笈是惟小夫技寧當丈夫業
譬如論唐虞何曾道郇葉如君負高識於此何足挾一
戰雖未霸遐心豈即怙朝廷方洽熙四夷皆遠懾坐復
洮河地直擣幽燕脅朝夕奏奇功羣儒爭鼓篋太平任
文治戰血何煩喋道德以為宇威武以為堞豈比叔孫
生雜用隨何頗吾衰何可道不死同原涉

德相惠新茶復次前韻奉謝

暑雨閭窮山道滑不可躡隱几念投老葛衣坐搖簞林
端使者至乃得德相帖佳惠致新茗遠來自閩笈吾聞
北苑勝不與羣山接山下幾千家以此為生業新陽一
日至東風方獵獵百草尚勾甲靈芽已先捷所採僅毛
髮厥工巧烹燂甘泉列盎釜熾炭浩旁疊修竹為之規
黃金為之挾形摹各臻妙製作易安帖至尊所虛佇守
臣方惕懾其上為虬龍蜿蜒奮鱗鬣稍降乃交鳳文翼
相盤跼函封趣北道驛使互防挾四方老金玉擬議誰

敢輒屹屹健士檐飄飄迅溪牒穀雨不及潤權門已盈
篋帶跨體正方葵華角仍摩始傳盛王鄭後來止游葉
大為權勢迫小或盜賊劫其間起鬪奪亦數冒刑楣南
夷出重購不憚浮海楫北人比尤好喜笑開雙睫豈不
產邛蜀豈不生楚漿厥品乃大戾固難一理攝朱門厭
酒肉辯士厲舌頰儒生備夜誦農夫困朝饁禪翁過江
蒼老獲空腹喋綺席夢騰騰玉山頭葉葉無魚乃尚可
非此意不厭一泛舌已潤載啜心更愜不惟豁神觀亦

足暢煩懣清泠生肺肝爽快勝抓鐻孰不恃薏苡伏波
煩謗囁孰不飲醇酎伯仁憂腐脅祖逖敦雅尚鴻漸未
博涉君謨號精鑒才翁亦相躡玉川七椀興令人解頤
歷奇章兩串賜遺芳在圖謀余昔喜賓客為世困書牒
輕重必酬酢往來煩躑躑自從竄夷裔所藏多敗帨亦
幸衰老年數病脾氣怯棄置在高閣魂夢昏多魘拘病
出湘漢餘生若蟬蝶希夷有幽卧刀劍銷銍缺一榻就
空曠百骸得和協久已廢翰墨况復道游俠有味養元

和無物累吾嚼臨風欲占謝遙企山西牒

初創二山

左山叢古木縈帶多美竹右山少平地硲礫斷蒼玉於此
豈無竹蕭疎倚崑谷上參九頂道俯浸清谿澳於彼豈無
石嵌崖大如屋景業讀書處基構有遺躅始吾購二山
何為不相屬中間古蘭若臺觀當山腹崑洞九十七龍
蛇所潛伏昔人作軒榭高深奇秋麓我乃巢西崦手自
親鉏斲青溪漫無際島嶼相重復雨餘山更佳春流漲

平峪下矚池陽市修烟弄芬馥大江天上來淮山點眉
綠老夫豈無意落日傲鴻鵠東嶺亦誅茆小菴麝容足
六峯引南睇九華勢相續白雲與誰期千載媚平陸清
曠無俗韻脩明資遠目去秋已種麥今春復栽粟野老
豈余欺東坡幸膏沐二山誰與適最與枯藤熟相見詎
無人顧我真麋鹿一年一瞬事何暇知委曲得此化餘
年不問君平卜

初泊磁湖

時子瞻
在齊安

歸舟不解洞庭帆
舟上騷人雪滿簪
小駐武昌江北岸
春風今夜泊江南

清冷臺

山前繚繞白雲飛
山下溪流那復迴
不向此間休歇去
寧將白髮汙塵埃

左史洞

在此山

萬古齊山石誰開
左史洞左史今何在
蒼崖本不動履
嶮下重壑幽深鬼
神總石門絕世路
久為塵泥擁青天

十畝地巔岼如覆瓮琬琰鑿屋壁烟霞列梁棟崖間不
死藥必非近時種人去境長在境與人為重欲觀疇昔
意幽禽發清哢吾方寄淵寂無礙亦無縱手自翦荆棘
結茆當石空長與麋鹿遊不復人間夢

送曾處善赴寶應尉

我初隱身治蓬蒿餘生不復人間世左山右山白雲上
一動一靜浮塵外齊山山上老夫庵青谿谿南侍中第
朱顏公子不易識短衣款段來相際長堤相望雖甚遠

有意即行終不計東鄰竹閣長夏熱我構雲巢方自蔽
爛斑石臺始一眺寂靜庵基猶未薙隨雲步訪胡矮老
放懷止得殊師利石橋寺前夜月冷金雞峯下秋霖霽
君恃馬足不憚遠我駕籃輿隨處稅六峯老師氣軒豁
九華雌山苦陰晦庵前菜茹常不厭城裏羊肩難數置
漫天風雪一暢目滿榻春陽欣炙背裘休自參黃檗禪
院福豈是一昌尉相見終年已解空分襟一別那成滯
拍江春水浮鷁首萬里青天運鵬翅順風莫寄南來書

老夫柴門多自閉

臺下

石梅落落欲黃時
細雨濛濛暗不開
數日不行臺下路
不知江水過山來

清冷臺初夏一首寄上翟舅

清冷竹樹暗成陰
漸有溪流過此岑
草草作巢方寄老
惜惜設榻本無心
松門不隔紅塵路
月疊初無俗物侵
欲向人間訪消息
渭陽應有遠遊吟

齊山偶題二首

杜子風情春水波至今詩句使人夸不知朽骨猶存否
山上年年黃菊花

朝雲未散白筇陂落日已過銅陵西不向人間生皓髮
直尋仙客上青谿

宋詩鈔卷三十八

欽定四庫全書

宋詩鈔卷三十九

內閣中書舍人吳之振編

沈邁西溪集鈔

邁字文通錢塘人以郊齋郎舉進士廷唱第一謂其
已官改第二通判江寧府除集賢校理知制誥出知
越杭二州遷龍圖閣直學士知開封府拜翰林學士
丁母憂卒於墓廬有西溪集十卷詩非其能事而唱

和者為王介甫蘇子美何故而止於是也

七言送僧思齊歸吳

西風送霜河水落東都歸客不可留
囊衣卷詩載輕舸飄然獨下東南州
吳山木落衆峯出越湖潦散孤嶼浮
橘丹萼紫新薦俎若下醪美不計售
十年塵埃一日去猿初脫檻鷹下韝
幽潛遠颺宵回首送之却顧令人愁
鱸魚正肥張翰老田園將蕪陶潛憂
子歸應有問予者為解區區茲有由

五言天台山送僧象微歸山

吾聞天台久嘗讀興公賦茲為東南鎮神竊之所據奇
挺究萬狀高低不足語頗疑說過夸特為辭之嫠象微
迺州民能識山之故從容試為問聊得一二疏赤城建
霞標上與斗牛附萬有八千丈矗若天一柱瀑布發高
源飛流翻四注雪霜浮虛空明晦亂朝暮巖足多丹石
光華燦寶璐猶溪百餘仞欲濟毛骨怖九折凌峻梁五
界窮幽路芝蘭散奇草松桂羅嘉樹祥風吹白雲飄然

若可御幽閔足瓌怪纖悉難畢具凡迹古不到神物陰
自護傳聞昔人說中有洞天處是名不死壚衆真所游
聚玉堂敞金庭碧林列瑤圃有能從而求得之迺仙去
斯言寧可信良非吾所慕吾志本丘壑久已失厥趣誰
言石渠客乃甚轍中鮒秋風日已高歸心浩欲驚茲山
宿所愛送爾緬東顧吾廬因爾卜俾來審繪素

七言景德寺考試院壁和王介甫所題詩

石藍開盡紅著地瓜蔓半枯黃倒垂坐看一夜芳意歇

風霜即是蚤寒時

五言蓬萊山送徐仲微赴蓬萊令

渤海三神山蓬萊隱嵯峨仙人桂葉舟浮矣明月波驚塵不可到飛鳥不能過世人但傳聞欲往為奈何胡然古荒王甘心事欺訛於今禱祠迹往往存山阿當時燕齊間方士肩相摩遺俗頗淪胥官不嚴禁訶子去為邑尹施捨各有科茲實繫教化無宜反姸姁平生學詩書仁術當切瑳毋曰百里小民人豈不多誰當之武城敢

復聞絃歌

七言和君倚景靈行

東城大道何逶迤中直清廟表六扉右臨景靈秘館之
翼翼衣帶相國浮圖之巍巍道旁他舍多絕赫車無停
輪馬交策風塵勃鬱千丈高素衣化緇雙眦塞南阡窮
巷我所居上下省戶兩歲餘病軀羸乘實厭畏每趨徑
路宮城隅宮牆倚空背環極隱隣樓臺露金碧朝霞夕
照天半明牆下行人徒眩惑我嘗入謁得縱觀威容物

采巖且完鸞車歲歲躬獻享孝思盼蠶通神歡重門設
衛日常闔靈境那知世人雜但見長松怪石列若屏突
兀陰森兩遮匝我家東南滄海涯乘時偶來觀德輝歸
飛故隱自有期何必於此空歎歎

七言和吳仲庶延菽閣後牡丹花

時後殿
考進士

承明待詔盡名儒一願當君奏六符獨笑開元供奉客
惟將歌句奉歡娛

南漪堂

山遶湖堂寺遶山平生願向此中間青雲白水相浮蕩
野客高僧獨往還年少無嫌軒冕累因循將恐髣髴斑
南漪最是逍遙地且挹清波濁愧顏

次韻和少述秋興

浩蕩西風動客裾飄然歸思滿田廬少時豈省為名誤
老去真知與世疎勝事祇隨詩句盡壯懷猶向酒杯舒
南山已有來年約三徑何年得自除

次韻和李審言上元寄王巖夫

此都豪麗歲仍豐此夕都人凱樂中
車馬笙簫千里至樓臺燈火九衢通
香輿輶輶凌風駛粉袂翩翩照地紅
病守行春真勉強更堪攀倚少年叢

次韻和王巖夫見寄

前日移舟就近村送君西望大梁門
九重宮闕天光遠千里江湖水氣昏
壯士遨遊應自適少年離別枉傷魂
北州為政須當厲即上青雲款帝閣

次韻和孫少述潤州望海樓

北固我栽鐵甕完京口浩浩海門連鵬搏羊角來天上
鼇戴方壺獻几前西府旌旗猶壯睹南朝宮殿盡蒼煙
登臨不用成悲感自得開懷一曠然

和少述春日

風流自古吳王國一一湖山盡勝遊上巳清明最佳節
萬家臨楔錦維舟

初晴池閣暖無塵花落絲飛不避人祇愛年年好光景
須知華髮一番新

卧病江東又見春
高齋長日坐生塵
看花飲酒應難強
猶有詩情謝故人

將至京口先寄孫少述并呈晏子俞

為郡無聞困米鹽
先生有道獨幽潛
豫章因甚尊徐孺
益部何能詘蜀嚴
已脫簿書身自放
肆尋山水意寧厭
京江最欲方洋處
願從屏星卷畫幰

奉酬潤州余少卿見寄

兩鎮旌旗對撫邦
老成循政獨難雙
賜環已許歸西省

擁櫂方來絕大江後乘願陪幽賞盡詩新頓使勇心降
主人意厚春湖小且卷孤帆偃畫杠

戲盧中甫錢才翁

晴日春風花氣浮少年嬉逐滿揚州誰憐居士身常病

獨坐空船理白頭

居士身常病一作終歲惛惛病

和仲甫新開湖

渺渺清波百里浮昔遊曾是一扁舟十年人事都如夢

猶識湖邊舊客郵

過冀州聞介甫送北使當相遇繼得移文以故事
請避諸路又以詩見寄次韻和答

風沙敝盡舊狐裘走馬歸來過冀州聞報故人當邂逅
便臨近館為遲留不容傾蓋論時事空寄新詩寫客愁
却望後車塵已合蕭聲清斷去如流

還家自戲

憶昨邊城初見春纖纖垂柳正矜新不知遠客貪歸意
欲把狂絲繫畫輪

依韻和李審言見贈叙舊

日與公家三世舊，坐看高閣壓亨衢。
梗枏屢構明堂厦，麟鳳更參聖代符。
結友固應皆以義，論詩何獨取於愚。
歸舟早晚乘潮渡，猶得西湖一笑無。

依韻和施正臣遊聖果寺

盤崖絕巘與天通，汗漫煙霞謝世籠。
聳起浮圖山突兀，自然銜石玉青葱。
古人興廢千年上，遊客登臨一嘯中。
誰為燕然愧班竇，孤城羈據亦銘功。

排銜石有
錢錄刻詩

贈郟縣桃源宮王道士

我昔郟谿遊道人亦相遇重來十歲餘顏色宛如故顧
我病衰早鬚毛已蒼然乃知世上榮詎若山中閒道人
家東都問胡不歸北北方多風塵素衣化為黑斯言吾
所信吾志亦江湖瀟洒會稽守平生欣莫如君恩容苟
安願奉三年計幸爾數到城間談北方事

次韻和不疑借書鄰幾遇其寢

嗟我江湖人野性實疎簡況從衰病侵事事益以懶豈

不嗟自強所思乃有限但愛江夫子平生事高散維於
讀書勤晝夜不去眼每勞從事賢獨使簿書綰揮署曾
不勞兼人信無赧有時倦欲休就席初不煖鄰友更借
書丁丁扣門版尤厭吏舍喧牛羊閑棚棧不如歸吾廬
靜對日晚晚詩成還示我足以驚幽孱

宋詩鈔卷三十九

欽定四庫全書

宋詩鈔卷四十

內閣中書舍人吳之振編

沈與求龜谿集鈔

與求字必先湖州德清人登政和五年進士累遷至
明州通判召對除監察御史歷兵部員外郎殿中侍
御史請都建康上不悅出知台州召還再除御史遷
御史中丞前後幾四百奏其言切直自敵己已下有

不能堪者高宗時有所訓勅每曰汝不識沈中丞耶
移吏部尚書出知潭州召除參知政事出知明州遷
知樞密院事卒謚忠敏其詩喜論體製格律源流所
自不貴苟作有龜谿集十二卷

次韻曾守懷玲瓏山

泉石有膏肓料理費和緩風埃客子遊夢想畧相半端
如饜羊酪投匕念鄉饌懷哉小玲瓏舊賞記酣宴玉女
下雲牕輕我年未冠誅茆老三間此意已懸斷少須草

堂資兩足那可絆謝公愛東山自結尋幽伴詩筒忽相
先紙價豈容賤流傳從使君感此歸思亂擷蘭躡危根
漱石俯長澗野性等麋鹿百嗜寧食薦攬衣中夜興測
漏疾流眊窘步愧驚筋卑飛傷短翰正使屐齒折未救
斧柯爛時節脫復徂遲莫空浩歎何當脂下澤去路鬱
交貫

錢塘賦水母

疾風吹雨回江城鰲牙嘔啞潮欲平客居喜無人事櫻

相與環坐臨前楹眼中水怪狀莫名出沒沙背如浮罌
復如緇笠絕兩纓渾沌七竅俱未形塊然背負羣鰕行
嗟其巧以怪自呈凝目懽視相將迎老漁旁睨笑發聲
曰此水母官何驚江流如奔絕滄瀛潮汐往來月為程
藏納衆污無滿盈浮埃沈滓溷九清結成此物宜昏盲
使鰕導迷作雙睛乃能接迹蚌與蛭亦猶巨蛩二體并
離則無目為光精江天八月霜葉鳴罟師得鰕供水征
水母棄擲羅縱橫試令收拾輸庖丁絳綦收涎體紆縈

飛刀鏤切武火烹花菱釘餌漿白英不殊冰盤堆水晶
稻醯齏寒芼香橙入齒已復能解醒遣漁止矣勿復評
嗟哉此性愚不更定矜故態招三彭且摩枵腹甘藜羹
泛舟村落阻風不能少進而菱梢芡觜繚舳上下

篙人病之

艇子掠岸行水瘦不濡尾狂飈振疎蓬獵獵鳴兩耳十
篙八九褪逆勢何乃爾野芡伺吾間回梢哆利觜亦有
芰浮角一一肆輕鄙初欲事幽尋解纜出疎葦乘流覓

清淺濯纓助深喜事大有不然移頃未離咫安得望蓬萊巨艦破潮起征帆駕長風一日三萬里

夜坐感事

沈沈夜氣歸虛堂閉深寂孤燈爇餘花寒雷韻殘滴醞釀萬斛愁感慨一人敵何當棄短檠陰山叱鳴鐃

戊申初寒偶作

去年十月冬猶溫單衣曉出錢塘門攜笥僅脫餓虎口更吟楚些招魂驚兒女爭從亂離苦咿啞遶膝多語言

舟行畏塗侵夜泊孤燈明滅何處村蕭蕭細雨疎葦響
風力漸搖枯柳根失聲號寒泣龍具促櫂傍險爭前奔
還家依然四壁立故衾敗絮那忍論無衣豈暇具裘褐
海圖坼裂波濤翻天公戲人亦太虐雪花徑尺連上元
今年十月事羈官兩脚如舊身大存紙窗寂歷風竹嘯
古木終夜號空園旅人不眠毛骨冷撫事念往多煩冤
吾儕小人不論數豺狼滿目哀王孫似聞易水寒墮指
北望大漠煙雲昏安得壯士馭八駿沙蟲猿鶴俱騰騫

歸歟莫如中土樂天子孝友朝廷尊坐令鐵衣掃蟻蟲
四海挾纊懷君恩

夜宿千秋嶺下田家

陰飈來悲風薄莫吹急雨冥冥攬寒色咫尺暗山路茅
簷兩三家曲澗縈竹塢停車遣問訊欲止此何許老翁
行步弱扶杖倚門戶問我官何忙野宿今無所向夜號
狐狸深林嘯豺虎甘心在擇肉闔首輒憑怒駕言往何
之一榻翁敢拒延我傍中堂慇懃慰良苦解衣土銕旁

支枕憇行旅昏然飽安眼境寂絕猜怖雞聲報明發征
車犯寒去呼燈別老翁鼻息方栩栩

維心方刊正三國史某以精筆遺之蒙餉大篇為
謝氣格渾然三復感歎漫依元韻奉和蕪陋增
愧

諸豪雄誇劒芒鋤毛錐斂避收餘尖櫝間黯黯渴銅雀
案上爬沙枯玉蟾學堂山人有遺裔筆力大可千人兼
掉頭不肯書柿葉酒酣起舞怒奮髯十年歸坐溪口屋

傲視冠冕猶髡笱草玄草聖聊戲耳如醫識藥信手拈
邇來直筆到三國去取法度何森嚴眼中青白世矜異
皮裏陽秋誰顧瞻更憐中書今且老雞毛葦管爭出奩
懸知入手便獐劣那復助子窮幽潛我持妙穎急送似
標題珍重存華鐵勢如執法貴心正俗病要以此語砭
揮掃定見龍蛇走紬繹何憚歲月淹須知筆意似人意
柔順未必非凶愴

清明日晚晴

正好園林藉落英
細風吹雨濕清明
牆陰旱渴休無賴
自有鳴鳩解喚晴

舟過荻塘

野航春入荻芽塘
遠意相傳接渺茫
落日一篙桃葉浪
薰風十里藕花香
河回遽失青山曲
菱老難容碧草芳
村北村南歌自答
懸知歲事到金穰

從劉殿院借書

骨寒宜伴列仙臞
欲喜依劉計未疎
自昔暗中人易記

到今名下士非虛欲從給事論奇字擬向中郎得異書
願借牙籤三萬軸為公一一辨蟬魚

過徐氏莊居

只着南冠不著纓掉頭防我問功名數椽茆屋有時漏
一墦野田無具耕酒地定能容勝踐墨畦終擬過平生
扣舷歸去蒹葭闊後夜相思看月明

過徐氏郊居

林梢眇眇隨斜暉剝啄還來扣隱扉門巷劣容居士屨

塵埃不到野人衣
恰當夜甑黃梁熟
盛供春山紫蕨肥
侍坐無人只山月
兩翁相對自忘機

次韻盧憲春意

少陵花惱便顛狂
天與多情付此郎
宿露園林鶯舌亂
暖風庭院蜜脾香
閒愁幾欲縈春事
幽怨還能入醉鄉
應斷玉樓雙望眼
便須催促理歸檣

次韻宏父喜雨

黃蘗初看捲麥禾
老農還復厭晴多
四郊屏尾閒新犢

一雨苗根長舊科已發政聲歸名杜更驚詩律鬪陰何
王孫欲識田家樂水亂溝塍涉可過

行簡以曾守韻見貽復和一篇

續經無復補嘉禾老去忘懷及見多摘尾簿書寧問署
點頭章句僅成科求田下澤吾行且招隱空山子謂何

行簡有早晚故
山歸種秫之句

千萬買鄰真左計一丘端約老相過

曾宏父將往雪川見內相葉公以詩為別次其韻
以自見

客裏思家且罷休無聊懷抱不禁愁時魚苦筍過百六
又到一年春盡頭

牆根啁啾百鳥鬧最愛乳鳩來喚晴日永春閒深院落
渠能使當管絃聲

揚舲送子下苕霅繫纜沙頭多柳株十載風埃老行客
不知鷗鳥記人無

前溪溪頭玉色魚羊酪豈可比鮮腴江黃會中有勝處
健步走置煩長鬚

野店山茶亦可口試敲松火煮石泉相逢故人如問訊
但道老去多煩煎

還憇湖光亭復次江元壽韻

羊酪蓴羹本異區江湖隨俗語姪隅紫鱗撥刺衝文杏
翠雨翩翹過綠蒲舴艋興饒青絡馬苓簪自當紫微壺
叢書較罷頻搔首天末孤帆去欲無

僕大自燕山來云有次律兄書被盜失去

投曉平安使倉皇扣倚廬修塗幸及此細語問何如云

自三關道曾持一紙書崎嶇經冠難隻影到鄉間

杜季習遊恒山謁府帥劉公輒次劉彥常韻作詩

送之

勇往都忘去路難曾吞螭虎氣桓桓吳頭楚尾三年夢
塞北江南五月寒瘦馬擊門留我別明珠攜袖許誰看
書生自有西江量何止能濡舌本乾

董采大有詩紀吳江豁然閣舊遊索僕繼和

湖陰舊雨記重來小閣深明傍水開蟬螭橫空橋倒影

琉璃拍岸浪成堆勝遊君復羨魚婢幽屏子方飯芋魁
遙想經行斷堤曲野花漂盡雪玫瑰

石壁寺山房即事

望斷南岡遠水通客檣來往酒旗風畫橋依約垂楊外
映帶殘霞一抹紅

石壁寺

山縈細路走修蛇峭壁連雲只蘚花木末忽看幡影亂
馬頭初見殿陰斜迴廊迤迤穿危嶠側澗涓涓露淺沙

秀色可餐吾事辦
粥魚茶板莫相夸

秋日閒居

茆屋秋風斗破除
蕭騷渾似浣溪居
青山侍坐從吾好
黃帽籠頭與俗疎
賴有園官能送菜
可無溪友解留魚
從今輒莫慚枵腹
一飽須煩插架書

野外罕人事

野外罕人事
雖貧心自寬
霜蔬供綠節
社酒泛黃團
日落歸牛近
風微宿鳥安
展書遮老眼
燈火砌儒酸

次子虛韻

誰能延月倚危樓，細履相將偶當游。
倦聽山歌懷舊俗，閒看水戲濺寒流。

土人以水戲然燈

燈光競作千門曉，酒力微

寬一掬，愁明日八分疲。
阿買詩饒元只在清眸。

次夕雨作用子虛韻奉懷次顏知魚軒小集

夾道繒山聳蜃樓，小軒終憶數條游。
月將人意十分滿，雨入溪光一派流。
靜聽屐聲喧夜市，旋挑燈炮醞春愁。
閑關不問陰晴事，時怪玄花掠病眸。

即事

造物勞人亦憫哉
又驅疲馬上崔嵬
經從野店初嘗筍
行盡江村始見梅
千里短書先夢寐
半生多難足風埃
桔槔俯仰成何事
已念漁蓑歸去來

次吳江

小邑蕭條兵火餘
狐狸入市自相呼
茆牆竹戶斜陽裏
十室生涯久已無

允迪招行簡卜居鷓鴣谷僕意羨之作詩送行兼

以自見

嚴陵灘下鷓鴣谷聞道元英舊隱廬鼻祖名高詩格在
耳孫才傑宦情疎漫山松桂雁行立入鄔茆茨星散居
知為劉郎賦招隱莫教花落通渠

子虛航重湖之險遠過山中輒次維心韻以謝

小窓眠蠍虎敗壁上蝸牛老樹陰垂合前山翠欲流狂
言違世用彊飯了身謀不謂輕千里能迂訪戴舟

次韻學士兄見一亭

塵土敗名如敗敵
雲山招隱似招降
謾傾魯酒醒猶獨
聊發吳謳調本雙
誰念佳人在空谷
自同漁父老清江
它年對榻分餘地
風雨蕭蕭夜打窓

次律兄餉魚魚不至而詩至頗類南海使君送酒
輒成絕句

憑虛公子騎鯨後
烏有先生控鯉初
可是凡魚亦仙去
空餘一紙腹中書

劉希顏提舉見過出自卞山居二詩次其韻

偈仄風塵際分攜歲月賒向來聞避地勝處偶為家對
客談鋒銳憂時酒量加中觴莫辭醉回首又天涯

次韻呈維心拙澀不工當為抵掌

粲粲疎梅短短牆騷人長恨失遺芳低徊草棘精神透
彷彿關山魂夢香月淡乍看清影亂春深終恐綠陰藏
歲寒為爾添愁絕倚樹微吟亦自傷

戲酬嘗草茶

慣看留客費瓜茶政羨多藏不示夸要使睡魔能偃草

肯慚惟伯解迷花一旗但覺烹殊品雙鳳何須覓瑞芽
待摘家山供茗飲與君盟約去驕奢

宋詩鈔卷四十